

**Siunnersuut:Inatsisartut Ombudsmandiat pillugu Inatsisartut inatsisaatnr. x,  
xx.xx.2017-imeersoq**

## **Kapitali 1**

*Inatsisartunut attaveqarneq*

**§ 1.** Inatsisartunut qinersisoqareernerit tamaasa atorfillu inuttaarukkaangat Inatsisartut Ombudsmandimik qinersisassapput.

*Imm. 2.* Ombudsmandi Inatsisartunit tatigineqarunnaarpot Ombudsmandi Inatsisartut soraarsissinnaavaat.

**§ 2.** Ombudsmandi toquppat Ombudsmandip suliai Inatsisartut Ombudsmandimik nutaamik qinersinissaasa tungaannut kimit suliarineqassanersut Inatsisartut Inatsisinut Ataatsimiitaliaata aalajangissavaa.

**§ 3.** Inatsisartunut Naalakkersuisunullu ilaasortat kommuninilu qinikkatut ilaasortat Ombudsmandip suliassaanik suliaqarsinnaanngillat.

*Imm. 2.* Ombudsmandi inatsisilerituutut soraarummeernermi angusisimasuussaaq.

**§ 4.** Ombudsmandi qaammatinik arfinilinnik siumut ilisimatitsilluni qaammatip naanerani soraarsinneqarnissaminik piumasaqarsinnaavoq.

*Imm. 2.* Ombudsmandi qaammatip 65-inik ukioqalerfimmi naaneranit soraarsinneqassaaq.

**§ 5.** Inatsisartunut qinersisoqareernerit tamaasa kiisalu Ombudsmanditut atorfiup inuttaarunnerani Inatsisartut Ombudsmandimut taartaasartoq toqqassa-vaat, taannalu Ombudsmandip suliassani suliami peqataasinnaassuseqannginnerup nassatarisanik isumagisinnaajunnaarpagit Ombudsmanditut sulisassaaq.

*Imm. 2* Suliami pissutsinik Ombudsmandip arlaannaannilluunniit illersuisuunnginneranik qularutiginnilersitsisinnaasoqarpat Ombudsmandip suliaq Inatsisartut Inatsisinut Ataatsimiitaliaannut nassiutissavaa, Ataatsimiitaliallu suliaq Ombudsmandimut taartaasartumut Inatsisartut qinigaannut suliarissanngortillugu tunniutissavaa.

*Imm. 3.* Ombudsmandi Inatsisartut Inatsisinut Ataatsimiitaliaat akuersiseqqaartinnagu pisortat namminersortulluunniit suliffiutaanni, ingerlassaanni, suliffeqarfiutaanni imaluunniit peqatigiiffinni suliffeqaqqusaanngilaq.

**§ 6.** Ombudsmandi suliaminik ingerlatsinermini Inatsisartunut attuumassuteqanngilaq.

*Imm. 2.* Inatsisartut Ombudsmandip sulinera pillugu aalajangersakkanik nalinginnaasunik aalajangersaasinnaapput.

## **Kapitali 2**

### *Ombudsmandip pisinnaatitaanera*

**§ 7.** Kalaallit Nunaanni Namminersorlutik Oqartussat kommunillu ataanni pisortat ingerlatsinerisa ilaat tamarmik Ombudsmandip sulinerani ilaatinneqarput. Pissutsit kiffaanngissusiagaasut paaqqinniffinni/suliffeqarfinni il.il. namminersortuni pisortani oqartussaasup aalajangiineratigut, pisortani oqartussaasup kaammattuteqarneratigut pisortaniluunniit oqartussaasup akuersineratigut akuersarneratigulluunniit kiffaanngissusiagaaffiusuni atugaat Ombudsmandip sulinerani pineqartunut aamma ilaatinneqarput. Pissutsit meeqqat paaqqinniffinni/suliffeqarfinni meeqqat eqqarsaatigalugit suliassanik imaaliallaannaq isumagisaqartuni atugaat Ombudsmandip sulinerani pineqartunut aammattaaq ilaatinneqarput.

*Imm. 2.* Aalajangiisartut, namminersortut inuilluunniit ataasiakkaat akornanni saqitsaassutinik isumannaatsumik periaaseqarlutik aalajangiisartut pillugit naammagittaalliuutit Ombudsmandip suliarissanngilai, naak aalajangiisartut pineqartut pisumi allami pisortat ingerlatsinerannut ilaasutut isigineqaraluartut.

*Imm. 3.* Ingerlatseqatigiiffit, suliffeqarfiiit, peqatigiiffit, il.il. inatsisisikkut imaluunniit aqutsinermi allaffisorluni aalajangiinikkut pisortat ingerlatsinerat pillugu inatsiseqartitsinermi atuuttumi malittarisassanut tunngavinnullu tamakkiisumik ilaannakortumilluunniit ilangunneqarpata Ombudsmandi aalajangiisinnaavoq suliffeqarfiiit pineqartut tamatuma annertoqataanik Ombudsmandip sulinerani pineqartunut ilaatinneqassasut.

**§ 8.** Kommunit ingerlatsinerannik naliliinermi kommunit aqutsineranni atugassarititaasut Ombudsmandip mianerissavai.

**§ 9.** Ilageeqarneq, pissutsit ilageeqarnermut tunngasut pillugit aalajangersakkanik Namminersorlutik Oqartussat aalajangersaasinjaanerattut annertutigisumik, Ombudsmandip susassarisaanut ilaavoq, matumanit apeqqutit ilagiit ajoqersuutaannut imaluunniit upperisamik nalunaajaanerannut toqqartumik allatigulluunniit tunngassuteqartut eqqaassanngikkaanni.

**§ 10.** Ombudsmandi sulinini pillugu Inatsisartunut ukiumoortumik nalunaaruteqartassaaq . Nalunaarut Inatsisartut ukiakkut nalinginnaasumik ataatsimiinnerminni oqaluuserissavaat. Nalunaarut tamanut saqqummiunneqartassaaq.

*Imm. 2.* Ombudsmandi suliaq aalajangersimasoq pillugu Inatsisartunut, Naalakkersuisunut imaluunniit communalbestyrelsimit nalunaaruteqarpat, tak. § 23, imaluunniit Ombudsmandip suliaq aalajangersimasoq ukiumoortumik nalunaarummini eqqartorsimappagu, pineqartup misissuinermi imminut sammitinneqartumi imminut illersorluni oqaaserisai Ombudsmandip nalunaarummi imaluunniit ukiumoortumik nalunaarummi paassisutissiissutigissavai.

**§ 11.** Ombudsmandi Inatsisartut inatsisaanni, Inatsisartut peqqussutaanni imaluunniit

aqutsinermi allaffissornikkut aalajangersakkani atuuttuni amigaateqartoqarneranik paasisaqaruni tamanna pillugu Inatsisartunut Naalakkersuisunullu nalunaaruteqassaaq. Kommunini aalajangersakkat amigaataat eqqarsaatigalugit Ombudsmandi kommunalbestyrelsimit pineqartumut nalunaaruteqassaaq.

**§ 12.** Oqartussat § 7-imni taaneqartut pillugit naammagittaalliuutit kimilluunniit Ombudsmandimut naammagittaalliuutigineqarsinnaapput. Kinaluunniit kiffaanngissusiagaasimasoq allakkatigut matoqqasutigut Ombudsmandimut saaffiginninnissaminut pisinnaatitaavoq.

*Imm. 2.* Naammagittaallior tup atini najugaqarfinilu nalunaarutigissavai, naammagittaalliuutip suliarinera pillugu nalunaarutinik Ombudsmandip naammagittaallior tumut nassiusiffigisinnaasaanik.

*Imm. 3.* Naammagittaalliuutiginiagaq pisup pineranit ukioq ataaseq qaangiutsinnagu suliassanngortinneqassaaq.

*Imm. 4.* Imm. 3-mi piffissaliunneqartoq Ombudsmandip pisuni immikkut ittuni sivitsorsinnaavaa.

**§ 13.** Pissutsit ingerlatsinermi oqartussaasumut allamut naammagittaalliuutigineqarsinnaasut pillugit naammagittaalliuutit aqutsinermi allaffissornikkut oqartussaasumit qullerpaamit aalajangiiffiqareersimatinnagit suliassanngortinneqarsinnaanngillat.

**§ 14.** Naammagittaalliuut misissuiner mik aallartitsinermut pissutigissallugu naammannersoq Ombudsmandip aalajangissavaa.

*Imm. 2.* Ombudsmandi naammagittaalliuutip suliarinissa itigartitsissutiginiarlugu aalajangeruni ajornanngippat naammagittaallior nissamut periarfissat allat pillugit ilitsersuussissaaq.

**§ 15.** Ombudsmandi suliamik nammineerluni misissuiffiginnilersinnaavoq.

*Imm. 2.* Ombudsmandi oqartussap sulianik suliarinninnera pillugu ataatsimut misissuiffiginnernik ingerlatsisinnaavoq.

**§ 16.** Atorfearfiit imaluunniit suliffeqarfiiit kiisalu atorfearfigisat allat suugaluartulluunniit Ombudsmandip sulinerani pineqartunut ilaatinneqartut Ombudsmandip misissuiffigisinnaavai. Ombudsmandip misissuiner mut taamaattumut atatillugu, §§ 19-20-p nassatarisaasa saniatigut, pissutsit suliffeqarfiiup oqartussaasulluunniit aaqqissuussaaneranut ingerlanneqarneranullu tunngasut kiisalu pissutsit suliffeqarfiiup oqartussaasulluunniit atuisuisa ingerlataasalu suliarineqarnerannut ingerlanneqarnerannulluunniit tunngasut isummat inuppalaassutsimut inunnillu ikiuiner mut tunngasut aallaavigalugit naliliiffigisinnaavai.

**§ 17.** Naalliutitsisarneq allatullu peqqarniinggaartumik, inuppalaanngitsumik imaluunniit nikanarsaataasumik pinnittarneq imaluunniit pillaasarneq akiorniarlugit Naalagaaffiit

Peqatigiit (FN-ip) isumaqatigiissutaannut ilassut 18. december 2002-meersoq nammineq piumassuseq malillugu ilannguffigineqarsinnaasoq tunngavigalugu nuna tamakkerlugu pinaveersaartsisutut suliassaq Ombudsmandip ilassummi aalajangersakkat tunngavigalugit isumagissavaa.

### **Kapitali 3** *Ombudsmandip sulianik suliariinnittarnera*

**§ 18.** Oqartussaasut il.il. Ombudsmandip sulinerani pineqartunut ilaatinneqartut paasissutissanik allagaatinillu il.il. Ombudsmandip tunniuteqqusaanik Ombudsmandimut nalunaaruteqarnissaminntun tunniussinissaminnullu pisussaaffeqarput.

*Imm. 2.* Ombudsmandip oqartussaasut il.il. sulinermini pineqartunut ilaatinneqartut allakkatigut oqaaseqaateqaqqullugit piumasaqarfingisinnavaai.

*Imm. 3.* Ombudsmandi inunnik misissuinermini pissutsit pingaaruteqartut pillugit eqqartuussivimmi nassuaateqartussanik aggeqqusisinnaavoq. Nassuaatit eqqartuussivimmi killisiuisarneq pillugu malittarisassat malillugit saqqummiunneqassapput.

*Imm. 4.* Ombudsmandip atorfeqarfifit imaluunniit suliffeqarfifit atorfeqarfiusulluunniit allat suugaluartut oqartussaasut § 7-imi taaneqartut il.il. suliassaannik ingerlatsiffiusut ornillugit misissuiffigisinnavaai, ininullu tamanut isersinnaatitaalluni.

*Imm. 5.* Ombudsmandi tamanna pisariaqartoq naliliisoqarpat sukkulluunniit kinaassutsip ilisarnaataanik pisariaqarneratut annertutigisumik takutitsilluni eqqartuussivillu aalajangiitinnungikkaluarlugu paaqqinniffinnik/suliffeqarfinnik il.il. inuit kiffaanngissusiagaaffigisimasaannik kiffaanngissusiagaaffigisinnasaannilluunniit, tak. § 7, imm. 1-imi oqaaseqatigiit aappaat, aamma paaqqinniffinnik/suliffeqarfinnik namminersortunik il.il. meeqqat eqqarsaatigalugit suliassanik imaaliallaannaq isumaginnittunik, tak. § 7, imm. 1-imi oqaaseqatigiit pingajui, misissuartorluni isersinnaavoq. Politiit misissuinerup ingerlanneqarnerani pisariaqarneratut annertutigisumik ikuutissapput.

**§ 19.** Oqartussaasut inuilluunniit, Ombudsmandip sulinerani pineqartunut ilaatinneqartut, inatsisinik atuuttunik unioqqutitsisumik iliuuseqarnersut imaluunniit allatut iliorlutik suliassaminnik ingerlatsinerminni kukkussuteqarnernut sumiginnaanernnulluunniit pisuussuteqarnersut Ombudsmandip misissussavaa.

*Imm. 2.* Pisortat ingerlatsineranni suliassat suliarineqartarnerat pillugu Inatsisartut inatsisaanni tunngaviit, tunngaviit allagaatinik paasitinneqarsinnaatitaaneq pillugu malittarisassanut tunngaviusut ilaatinngagit, Ombudsmandip sulianik suliariinninnerani aamma tamaatut atuutissapput.

**§ 20.** Ombudsmandi isornartorsiuisinnaavoq, inassuteqaateqarsinnaalluni suliarilu pillugu paasinninnerminik saqqummiussisinnaalluni.

**§ 21.** Oqartussaasoq inulluunniit pineqartoq oqaaseqaateqarnissamut

periarfissinneqareersimatinngagu Ombudsmandi isornartorsiuilluni, inassuteqaateqarluni il.il. oqaaseqaateqassanngilaq.

*Imm. 2.* Ombudsmandip aalajangersinnaavaa tusarniaanermi allakkat, oqaaseqaataagallartoq, nassuaataagallartoq imaluunniit § 15 naapertorlugu suliniut Ombudsmandip nammineerluni misissuiffigisassanngortitaa pillugu nassuaataagallartoq pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaat aamma pisortat ingerlatsineranni suliassat suliarineqartarnerat pillugu Inatsisartut inatsisaat tunngavigalugu suliami allagaatinik paasitinneqarsinnaatitaanermut aatsaat ilaatinneqalissasoq inaarutaasumik oqaaseqaatip, inaarutaasumik nassuaatip imaluunniit inaarutaasumik nalunaarusiapiq oqartussaasumut pineqartumut ullup nassiusiviusup aqaguan.

**§ 22.** Pissutsit Ombudsmandip sulinerani pineqartunut ilaatinneqartut pissutigalugit suliap pineqartumut aningaasartuutaanngitsumik eqqartuussivikkut suliarineqarnissaa Ombudsmandip inassuteqaatigisinnaavaa.

**§ 23.** Ombudsmandip suliamik misissuinerata takutippagu pisortat ingerlatsivianni annertunerusumik kukkussuteqartoqarsimanissa imaluunniit sumiginnaasoqarsimanissa ilimagisariaqartoq, Ombudsmandi suliaq pillugu Inatsisartut Inatsisinut Ataatsimiititaliaannut tamatumunngalu peqatigitillugu Naalakkersuisunut imaluunniit communalbestyrelsimum nalunaaruteqassaaq.

**§ 24.** Ombudsmandip aalajangiineri, oqaaseqaatai il.il. pissutigalugit innuttaasunik eqqartuussisarneq pillugu inatsimmi periaatsit tunngavigalugit Ombudsmandimik eqqartuussivimmut suliassanngortitsinerit Ombudsmandip piumasaqarnera tunngavigalugu eqqartuussivimmit tunuartinneqarsinnaapput.

## **Kapitali 4**

*Pissutsit aaqqissuussaanermut tunngasut*

**§ 25.** Ombudsmandi Inatsisartut Allattaanerattut akissarsiaqartinneqassaaq. Ombudsmandi tamatuma saniatigut pissutsit qanoq ittuunerat apeqqutaatillugu inummut tapilerneqarsinnaavoq. Ombudsmandi sulilernerminut soraernerminullu atatillugu akiliunneqarluni angalasinnaatitaavoq, nuunnermilu aningaasartuutinik akiliunneqarsinnaatitaalluni. Ombudsmandi Ombudsmandiunnaarnersiutisiaqarsinnaatitaavoq soraernerussutisiaqarsinnaatitaallunilu il.il., Naalakkersuisuni ilaasortanut tamakku pillugit malittarisassat atuuttut tunngavigalugit.

*Imm. 2.* Ombudsmandip imm. 1 tunngavigalugu Ombudsmandiunnaarnersiutisiaqarsinnaatitaallunilu soraernerussutisiaqarsinnaatitaallunilu taarsiullugu soraernerussutisiaqartitsinermik aaqqissuussinermut Ombudsmandip toqqagaanut Ombudsmandip akissarsiai tunngavigalugit soraernerussutisiaqartitsinermik aaqqissuussineq imminut atorneqartussaq suli toqqarnagu toqukkut qimaguppat aappaasumut soraernerussutisiaqartussat aalaja-

ngersarneqarneranni aaqqiissut aappaasumut iluaqtissarsiviunerpaaasoq toqcarneqassaaq.

*Imm. 3.* Ombudsmandi siumut ilisimatitsissutaanngitsumik tunuartariaqassaguni akissarsiassani qaammatip tunuarfimmi naaneranit qaammatini pingasuni pigiinnassavai. Ombudsmandi piffissaq taanna naanngitsoq toquppat akissarsiassaasa ilaat toqunerata nalaani tunniunneqarsimannngitsut Ombudsmandip aapparisata, imaluunniit aapparisaminik qimataqanngippat, Ombudsmandip qitornaasa meeqqanut qimataanersiutinik pisinnaatitaasut pissavaat. Akissarsiassat tunniunneqartartillugit Ombudsmandiujunnaarnersiutinik soraernerussutisianilluunniit tunniussisoqassanngilaq.

**§ 26.** Ombudsmandip sulisuni nammineq atorfinitssittassavai soraarsittassallugillu. Taakku qassiunissaat, akissarsiassat aamma soraernerussutisissaat Inatsisartut Suleriaasianni malittarisassat tunngavigalugit aalajangersarneqassapput.

*Imm. 2.* Ombudsmandip missingersuutai Inatsisartut missingersuutaasa ilagaat.

*Imm. 3.* Ombudsmandip naatsorsuutaanik saqqummiussineq kukkunersiinerlu Inatsisartut Suleriaasianni aalajangersarneqassapput.

*Imm. 4.* Ombudsmandi naatsorsuuserinerminut imminullu aningaasaliissutigineqartut aqunneqarnerinut akisussaavoq.

*Imm. 5.* Ombudsmandi aaqqissuussaanermini suliassat naammassiniarnerini oqartussaasunit allanillu Ombudsmandip nakkutilliinerani pineqartunut ilaatinneqartunit kiffartuussinernik ikiorneqarnermilluunniit pissarsiniarpat Ombudsmandip oqartussaasoq pineqartoq suliassap naammassiniarneqarnissaa pillugu isumaqatigiissuteqarfigissavaa.

**§ 27.** Ombudsmandip suliassani sulisumi ilaata utaqqiisaagallartumik sularissagai aalajangersinnaava.

**§ 28.** Ombudsmandi pissutsinik sulinermini ilisimalersimasaminik nipangiussisussaa-titaavoq, isertuussinissaq pissutsit imminni pissusissamisoortuutippassuk.

Nipangiussisussaatitaaneq Ombudsmandip atorfimminit tunuarneratigut atorunnaarneq ajorpoq. Taamatut pisussaaffiligaaneq Ombudsmandip sulisuinut aamma atuuppoq.

*Imm. 2.* Inuit, suliffeqarfiiq aqtsinermilu allaffissornikkut oqartussaasut Ombudsmandip suleqatigiinnissamik isumaqatigiissuteqarfigisai paassisutissat isertuussassat Ombudsmandip oqartussaasumut, inummut imaluunniit suliffeqarfimmut pineqartumut nipangiussisussaatitaanngitsumut ingerlateqqillugit tunniussai eqqarsaatigalugit taanna nipangiussisussaatitaassasoq Ombudsmandip aalajangersinnaavaa.

**§ 29.** Taaguut Ombudsmandi imaluunniit taaguut alla taassumunnga paarlaanneqarsinnaasoq inatsimmik Inatsisartunit akuersissutigineqarsimasumik tunngaveqartinneqanngikkuni atorneqassanngilaq.

## Kapitali 5

*Atortuulersitsineq il.il.*

**§ 30.** Inatsisartut inatsisaat manna 1. juli 2017-imí atortuulerpoq.

*Imm.* 2. Tamatumunnga peqatigitillugu Inatsisartut Ombudsmandiat pillugu Inatsisartut inatsisaat nr. 8, 3. december 2009-meersoq atorunnaarsinnejnar-poq.

*Imm.* 3. Taamaattorli naammagittaalliuutit inatsisip matuma atortuulersinnejnarpoq Ombudsmandimut naammagittaalliuutigineqarsimasut Inatsisartut Ombudsmandiat pillugu Inatsisartut inatsisaat nr. 8, 3. december 2009-meersoq tunngavigalugu suliarineqassapput.

*Namminersorlutik Oqartussat, xx.xx. 2017*

*Kim Kielsen*